

Die Rollende Schwabenkanzel: Verschwörungszirkus

Hexa - Glaubet Ihr, oi gotzig Hex wär fiar dees verbrennt worra, was se wirklich doa hot? S'Kraut vrhaglat, d'Milch sauer gmacht, mit am Deifl Oozucht trieba? A wa! It oine war schuldig, it oine! Verschwora hend sich Menner gega Frau! Au in meirer Hoimet hend se oine däglang gfoltarat ond ombrocht, z'Veenga an dr kiala Lauchert, d'Bader-Ann, em Juni 1680, it so lang her, wia mer moina kennt.

Aber dia meischte Leit, wo eppes vo Weltverschwerung wissa wellat, vo Mächte, wo hentarom alle Karra lenkat, send Luagabeitl, mol oifeltig, mol bees. Oine geit's aber, oi Machaschaft, wo's Zeig ghatt hot, zom d'Welt zom verändara, wo der Fluß vo dr Zeit schier omgleitet worra wär en a neis Bett mit hellere Diachr.

An nobler Sproß isch's gsei, wo gsait hot: «I mach's!» - aber au a Kend vom Schwobaland, z'Lautlenga ischer groß worra ond z'Stuergert em Alta Schloß, wonderfitzig ischer omanandergstroift als Pfadfender auf da oigana Fiaß, bald au hoch zu Roß, sell hot er bsonders guat kenna, bis zom Rittmoischer hot er's brocht mit Ehrasäbel als Kavallerischt.

Zwischen da Weltgriag send große Schlachta gschlaga worra en da Kepf ond en da Biachr, do war er au mit Leidaschaft drbei, ema Grois vom a Dichter. Aber so ganz dicht warat dia Manna ond Burscha vo dem Grois it, dia hend scho au eppes vo dem beschwora, was 1933 em Reich ausem brauna Sompf naufglupft an d'Macht worra ischt.

A ganze Zeitlang hot's em daugt, au no da Iberfall auf da Nochber em Oschta isch fiar ihn wertlich a «Erlesung» gsei. Jo, an Nationalischt ond Kriegstreiber war er gwieß, an Rassischt, mer

Johannes F. Kretschmann - Verschwörungszirkus - Unlingen, 30. August 2020

kas schwer verleigna, an Antisemit, do send sich d'Forscher it ganz oinig. Aber späteschtens als Krippel hot er sich bsonna. 10 Jahr noch der Erhebung vo Volk ond Fihrer hot's an z'Tunesien bees vrtwischt, oi Aug hot er verlora, oi ganze Hand ond vo da andara au no zwoi Fenger.

Dekoriert mit am Eiserna Greiz erschte Glaß hot er sein Eid auf sellan mit dr Rotzbrems brocha ond an Aaschlag auf en bschlossa, mit ara Hampfl vo andere Offizier, dia moischte au Von ond Zuas. Aber s'hot it bloß a Attatat auf da mendsche Tirann vo da brennanda Welt sei solla, noi, a richtigs Komplott hend se organisiert. Am a Blaa vo dr Wehrmacht, am 'Onternehma Walküre' hend se so rombäschtlat, daß se alle Gwalt an sich grissa hättet, dia Mordslompa vo dr SS entwaffnet ond d'braune Partei vo da Schaltstella drängt.

End Luft hätt er en sprenga solla, den, wo so vill Leit end Luft blosa hot, durch d'Kamee vo Auschwitz, Treblinka, Sobibor. D'Juda, ooschuldig waret se wia d'Hexa. Koiner hot des doa, fiar wa mer en ombrocht hot, it oiner!

Dr schwäbische Oberscht hot vier Manna ombrocht mit seirer Bomb, bloß sei Ziel hot er vrfählt. Er hät bloß sell ooscharfs Kilo Sprengstoff zom scharfer Stoff end Aktadasch neilega braucha - noch hät's a End ghatt mit dr Rotzbrems, vielleicht au mit am Griag, mit am Morda.

Aber so isch's it ganga. Dr sell hot iberläbt. Da Bombaleger hot mer glei vrschossa, vrscharrat, am näkshta Dag ausgraba, vrbrennt ond sei Äscha iber ara Kläralag, domols Rieselfelder, vrstrait. Seine Kumpana hot mer an Drohtsoiler ghenkt, ond vocher d'Hosa rabzoga, domit koin Zweifel herrscht: dia send a Schand fiar Deitschland! So hend se lang dengkt, vill Deitsche, au wo's Dritte Reich scho längscht zua rer Bundesrepublik worra isch.

Jo, liabe Leit, wo do hana z'Oolenga zamma komma send, sell war a Verschwerong ond koi Verschwerongstheorie. Claus Philipp Maria Schenk Graf vo Stauffaberg hot sich vrschwora it gega d'Große Koalitio, d'Wissaschaft, dr gsonde Menschavrstand, noi, gega a Machtmaschee, merderischs Oorecht ond a Mehrheit, wo's hot laufa lau.

Do drfir hot er alles en d'Waagschal glegt: d'Ehre vo seirer nobla Sipp, sei Leaba ond no meh. Gwieß ond it ohne Grond hot er er a Heidaangschtt ghett om seine vier Kender, ois no em Schoß vo dr Nina, seim Weib. I beig mei Gnui vor so ma Muat.

Des war a Gschicht vom a Sommer von vor 76 Jahr. Ganz schee ernscht fiar a Sommerschicht. Dia, wo sich em Sommer 2020 selber Querdenker hoißat ond zom Doil Maskaträger als Nazis bezoichnet, hend's vor allem mit sich selber ernscht. Aufs Spiel setza dend dia it vill, am wenigschta Leib ond Leba, eher no d'Xondheit vo da andere, weil se mit Fleiß koin Abstand haltat. Daß se domit glempflich durekommat, ohne alles zom riskiera wia domols d'Vrschwerer, isch guat so. Denn mir läbat zom Glick en ara sampfta Demokratie.